

Homenahe postumo na poeta Federico Oduber



ORANJESTAD - Diahuebs, dia 21 di juli 2011, Biblioteca Nacional Aruba (BNA) hunto cu Fundacion Lanta Papiamento (FLP) a organisa un anochi literario como un homenahe postumo na e gran poeta Arubiano

Federico Oduber. Invitado di honor tabata su viuda señora Lucia Oduber-Leckie y su yiu muhe Ludimilla Oduber.

Federico Oduber a nace na Aruba dia 27 di januari 1942 y a fayece na Corsou

dia 26 di juli 2007. Su fayecimento na un edad relativamente hoben tabata un golpi grandi pa su famia, pero tambe pa e mundo di literatura Arubiano y Antiano.

Federico a publica dos coleccion di poesia, esta "Besseffend" (1961) y "Putesia" (1973). Banda di e dos coleccionnan aki el a publica den e revista "Kambio" y den e semanario "Observador". Federico su poesia ta di caliber innovador y di nivel hopi halto y BNA y FLP ta di opinion cu pueblo di Aruba mester haya sa esaki. Pesey e homenahe aki tabatin un meta literario y informativo-educativo.

E tres charlanan di e anochi aki a pone enfasis netaamente riba e aspectonan aki.

Ramon Todd Dandaré a duna un relato di su experiencia cu Federico como mucha, adolescente, estudiante y adulto.

Ernesto Rosenstand a duna un bista den e bida familiar di Federico, specialmente tocante e dos bandanan di su personalidad: e banda rebelde y e banda sensibil, loke ta refleha den su poesia. Morto di Federico su mama y despues di su tata a haci un impacto



emocional masha grandi den Federico su bida.

Pedro Velásquez a haci un analisis literario di e poemanan di Federico y a presenta e analisis aki den un forma hopi cla cu hopi ehempel. Pedro a splica e titulo "Putesia" y a trata e 'credo poetico' di Federico y e aspecto di 'mortalidad' cu ta hopi fuerte como un tema constante den su poesia. Interesante tambe ta e discurso religioso cu Federico ta presenta den su obra.

Publico por a gosa di declamacion di varios poema di Federico, loke tabata na encargo di Gwendy Sneek y Victor Mathilda.

Yiu muhe di Federico, Ludmilla, a gradici pa e homenahe special aki y a conta tambe con semper el a haya e poesia di su tata hopi dificil, pero cu awor cu e ta adulto, madura y sa mas di su tata, e ta comprende nan y aprecia nan

cada biaha mas.

Pa Lucia y Ludmilla e anochi aki tabata basta emocional. Nan a aprecia e gesto aki masha.

Importante pa menciona ta e hecho cu Federico a laga pa BNA un parti grandi di su biblioteca personal, cu ta consisti di masha hopi buki di literatura universal. E bukinan aki lo haya un luga den e filial di BNA na San Nicolas, asina cu e reorganizacion di BNA keda cla. E bukinan aki lo ta disponibel pa esnan cu ta haci un estudio special di literatura.

Como muestra di gratitud y aprecio BNA y FLP a entrega na Lucia y Ludmilla un placa conmemorativo. Y naturalmente Etty Toppenberg & su grupo (Ebby Peterson, Pedro Velásquez y Lucio Rivadeneira) tabatey pa deleita e presentenan cu nan musica crioyo durante e brindis cu a sigui despues. □